

Na osnovu člana 44. stav 2. i člana 57a. Zakona o pravobranilaštvu ("Službene novine Kantona Sarajevo", broj 33/08 - Novi prečišćeni tekst, broj: 7/12 i 44/16) i člana 70. stav 1. tačka 2. Statuta Općine Vogošća ("Službene novine Kantona Sarajevo", broj 27/14 - Prečišćeni tekst i 14/15), Općinsko vijeće Vogošća, na sjednici održanoj 28.02.2018. godine, donijelo je e

ODLUKU
O IZMJENAMA I DOPUNAMA ODLUKE O
PRAVOBRANILAŠTVU OPĆINE VOGOŠĆA

Član 1.

U Odluci o Pravobranilaštvu Općine Vogošća ("Službene novine Kantona Sarajevo", broj: 27/02 i 19/07), u članu 3. dodaju se novi stavovi 4., 5. i 6. koji glase:

"Kada Pravobranilaštvo mora postupati u propisanom zakonskom roku, organi i organizacije iz stava 1. i 2. ovog člana dužni su da pravobraniocu neodložno dostave spise i obavještenja, odnosno pruže podatke i objašnjenja koja Pravobranilaštvo zatraži.

Ako zbog nepostupanja, odnosno neblagovremenog postupanja organa i organizacija iz stava 1. i 2. ovog člana, nastupi šteta za Općinu Vogošća ili druge subjekte koje zastupa, Pravobranilaštvo o tome obavještava organ koji je ovlašten da vrši nadzor nad radom tog organa ili organizacije i Općinskog načelnika i podnosi rukovodiocu zastupanog organa ili organizacije zahtjev za pokretanje disciplinskog postupka, radi utvrđivanja disciplinske odgovornosti lica koje je bilo dužno postupiti po zahtjevu Pravobranilaštva.

Rukovodilac zastupanog organa ili organizacije obavezan je pokrenuti postupak iz stava 5. ovog člana i o postupanju po zahtjevu Pravobranilaštva za pokretanje postupka utvrđivanja odgovornosti i o ishodu pokrenutog postupka ovlašteno lice je dužno obavijestiti Pravobranilaštvo, koje je dužno protiv lica za koje je utvrđena disciplinska odgovornost podnijeti zahtjev za naknadu pričinjene štete."

Član 2.

Iza člana 6. dodaje se novi član 6 a. koji glasi:

"Član 6a.

U Pravobranilaštvu su u ravnopravnoj upotrebi bosanski, hrvatski i srpski jezik i latinično i ćirilično pismo.

Pravobranilaštvo može koristiti i ostale jezike kao sredstvo komunikacije."

Član 3.

Član 8. mijenja se i glasi:

"Član 8.

Organi, javna preduzeća, javne ustanove i druga pravna lica iz člana 7. ove Odluke, dužni su blagovremeno obavijestiti Pravobranilaštvo o slučajevima u kojima je ono ovlašteno da ih zastupa i ulaže pravna sredstva i preduzima druge zakonom određene pravne radnje, te da mu dostave svu potrebnu dokumentaciju.

Poslove zastupanja organa i pravnih lica, Pravobranilaštvo vrši u svim sudskim postupcima i upravnom postupku, u skladu sa zakonom.

Pravobranilaštvo može zastupati državne organe koji su tuženi u upravnom sporu, ako ga oni na to ovlaste, kada je povrijeđena imovina i imovinski interes Općine.

Ukoliko pravosnažnom presudom bude utvrđen nezakonit rad ili odluka zastupanog organa ili organizacije, Pravobranilaštvo o tome obavještava organ koji je ovlašten da vrši nadzor nad radom tog organa ili organizacije i Općinskog načelnika, te podnosi rukovodiocu zastupanog organa ili organizacije zahtjev za pokretanje disciplinskog postupka radi utvrđivanja odgovornosti za nezakonit rad ili nezakonitu odluku.

Rukovodilac zastupanog organa ili organizacije obavezan je pokrenuti postupak iz stava 4. ovog člana i o postupanju po zahtjevu Pravobranilaštva za pokretanje postupak utvrđivanja odgovornosti i ishodu pokrenutog postupka ovlašteno lice je dužno obavijestiti Pravobranilaštvo.”

Član 4.

Iza člana 8. Odluke dodaje se novi član 8a., koji glasi:

“Član 8a.

U vršenju poslova zastupanja, Pravobranilaštvo je ovlašteno da preuzima sve radnje koje preuzima stranka u postupku.

Ako Pravobranilaštvo smatra da ne treba pokrenuti određeni postupak ili da treba povući tužbu ili da ne treba izjaviti određeni pravni lijek, obavještava o tome subjekt kojeg zastupa.

Ako se ne postigne saglasnost u mišljenju ili ako subjekt ne odgovori u određenom roku, konačnu odluku donosi Pravobranilaštvo i o tome obavještava subjekt kojeg zastupa.”

Član 5.

Član 10. mijenja se i glasi:

“Član 10.

Pravobranilaštvo pruža stručnu pomoć organima i pravnim licima iz člana 7. ove Odluke u rješavanju imovinsko-pravnih pitanja i daje mišljenje u vezi sa zaključivanjem ugovora imovinsko-pravne prirode (u daljnjem tekstu: mišljenje).

Organi i pravna lica iz prethodnog stava dužni su pribaviti pravno mišljenje Pravobranilaštva prije zaključenja ugovora o kupoprodaji, zamjeni, zakupu, prenosu na privremeno ili trajno korištenje stvari uz naknadu ili bez naknade, ugovora o koncesiji, ugovora o građenju i udruživanju sredstava za građenje, ugovora o statusnim i ugovornim oblicima povezivanja preduzeća, kao i drugih ugovora kojima se pribavljaju stvari ili raspolaze stvarima, odnosno materijalnim pravima.

Organi i pravna lica iz stava 1. ovog člana dužni su pribaviti i saglasnost Općinskog vijeća prije zaključenja ugovora imovinsko-pravne prirode iz stava 2. ovog člana, u skladu sa Statutom Općine i zakonom, a ukoliko na te ugovore nije pribavljeno pravno mišljenje Pravobranilaštva, Vijeće ih neće ni razmatrati, odnosno odbiće davanje saglasnosti.

Kada je predmet ugovora iz stava 2. ovog člana pokretna stvar ili imovinsko pravo čija vrijednost ne prelazi 10.000 KM na dan utvrđivanja vrijednosti, nije obavezno pribavljanje pravnog mišljenja Pravobranilaštva, niti saglasnosti Općinskog vijeća.

Pravobranilaštvo mišljenje iz stava 1. i 2. ovog člana daje najkasnije u roku od 15 dana od dana prijema zahtjeva i potrebne dokumentacije, a u naročito složenim slučajevima u roku od 30 dana.

O ugovorima zaključenim bez prethodnog pravnog mišljenja Pravobranilaštva iz stava 2. ovog člana, Pravobranilaštvo obavještava organ koji je ovlašten da vrši

nadzor nad radom tog organa ili organizacije i Općinskog načelnika, te podnosi rukovodiocu zastupanog organa ili organizacije zahtjev za pokretanje disciplinskog postupka radi utvrđivanja odgovornosti lica koje je bilo dužno pribaviti pravno mišljenje Pravobranilaštva.

Rukovodilac zastupanog organa ili organizacije obavezan je pokrenuti disciplinski postupak iz prethodnog stava, i o tome, kao i o ishodu pokrenutog postupka, dužan je blagovremeno, izvjestiti Pravobranilaštvo”.

Član 6.

Iza člana 10. dodaju se novi članovi 10a. i 10b., koji glase:

"Član 10a.

Pravobranilaštvo daje Općinskom vijeću i Općinskom načelniku, na njihov zahtjev, pravno mišljenje o imovinsko-pravnim ugovorima, koje namjeravaju da zaključe sa stranim pravnim i fizičkim licima, kao i o drugim imovinsko-pravnim odnosima sa tim licima.

Član 10b.

Organi, ustanove, javna preduzeća i druga pravna lica iz člana 7. ove Odluke dužni su zaključeni ugovor imovinsko-pravne prirode dostaviti Pravobranilaštvu, u roku od 15 dana od dana zaključenja ugovora.

Ako Pravobranilaštvo ocijeni da je zaključeni ugovor ništav, podnijet će tužbu za utvrđivanje ništavosti, a u slučaju da ugovorena cijena ne odgovara tržišnoj vrijednosti - tužbu za poništenje ugovora ili izmjenu ugovora.“

Član 7.

Član 13. mijenja se i glasi:

"Član 13.

Pravobranioca i zamjenika pravobranioca imenuje, smjenjuje i razrješava Općinsko vijeće, na prijedlog Općinskog načelnika.“

Član 8.

U članu 14. iza riječi: "diplomirani pravnik“, dodaju se riječi: "ili Bakalaureat/Bachelor prava sa ostvarenih 240 ECTS studijskih bodova Bolonjskog sistema studiranja“, a iza riječi: "tri godine“, dodaju se riječi: "nakon položenog pravosudnog ispita“.

Član 9.

Iza člana 15., dodaje se novi član 15a., koji glasi:

"Član 15a.

Pravobraniocu koji ne bude ponovo imenovan prestaje funkcija pravobranioca, ali mu ne prestaje radni odnos.

Pravobranilac koji ne bude ponovo imenovan, raspoređuje se na mjesto zamjenika pravobranioca, ukoliko je upražnjeno, a ako nije, raspoređuje se na mjesto državnog službenika u Pravobranilaštvu ili drugom općinskom organu u skladu sa svojim stručnim kvalifikacijama.

Rješenje o raspoređivanju pravobranioca na mjesto zamjenika pravobranioca

donosi Općinsko vijeće, a na mjesto državnog službenika Općinski načelnik, najkasnije u roku od tri mjeseca od dana prestanka funkcije pravobranioca.

Ako pravobranilac ne prihvati raspored na poslove po rješenju iz prethodnog stava ovog člana, prestaje mu radni odnos, po isteku 30 dana od dana donošenja rješenja.“

Član 10.

U članu 17. dodaje se stav 4. koji glasi:

"Pravobranilac i zamjenik pravobranioca ne mogu biti krivično gonjeni ili lišeni slobode zbog iskazanog mišljenja ili odluke donesene u vršenju funkcije".

Član 11.

Član 18. mijenja se i glasi:

"Član 18.

Pravobraniocu funkcija prestaje istekom perioda za koji je imenovan, podnošenjem ostavke, smjenjivanjem, kada ispuni uslove za odlazak u penziju propisane zakonom za državne službenike i u slučaju smrti.

Zamjeniku pravobranioca funkcija prestaje podnošenjem ostavke, smjenjivanjem, kada ispuni uslove za odlazak u penziju propisane zakonom za državne službenike i u slučaju smrti.

U slučajevima iz stava 1. i 2. ovog člana, donosi se odluka o razrješenju."

Član 12.

U članu 21. stav 2. mijenja se i glasi:

"Pravobraniocu i zamjeniku pravobranioca prestaje vršenje službe danom razrješenja zbog podnesene ostavke, a najkasnije u roku od 30 dana od dana podnošenja ostavke.“

Član 13.

Ova Odluka stupa na snagu osmog dana od dana objavljivanja u "Službenim novinama Kantona Sarajevo."

Broj: 01-02-22/18
Vogošća, 28.02.2018.godine

